

Uunga siunnersuut:
Naligiissitaaneq assigiinngisitsinnginnissarlu pillugit Inatsisartut inatsisaat

Kapitali 1

Inatsisip siunertaa atuuffissaalu

§ 1. Inatsisartut inatsisaanni siunertaavoq, assigiinngisitsinernik akiuiniarnissaq aammalu suaassutsip, naartunerup, meeravissartaarnerup, erninermi sulinngiffeqarnerup, kinguaassitutigut sammiviup, suaassutsini kinaassuseqarnerup, suaassutsimik takutitsinerup, suaassutsit ilisarnaataasa, kingoqqiffiup, ammip qalipaataata, inuiaqatigiinni, inooqatigiinnermi imaluunniit inuianni pinngorfiup, innarluuteqarnerup, ukiut, politikikkikut isiginnittaatsip, upperisap imaluunniit upperisaqarneq apeqquaatinnagit naligiimmik pisinnaatitaaffeqarnerup periarfissaqarnissallu qulakkeernissaat.

§ 2. Inatsisartut inatsisaat inuiaqatigiinnut tunngasuni tamani atuuppoq, takukkilli imm. 2 aamma 3.

Imm. 2. Inatsisartut inatsisaat ilaqutariit inuuneranni assigiinngisitsinermik allatulluunniit namminiinnarmut tunngasunut atuutinngilaq.

Imm. 3. Inatsisartut inatsisaat atuuppoq pisinnaatitaaffiit pitsaanerusumik inatsisini allani maleruagassaniluunniit aalajangersarneqarsimannngimmata.

Kapitali 2

Assigiinngisitsinissamik inerteqquteqarneq

§ 3. Inuup Inatsisartut inatsisaat malillugu pisinnaatitaaffini taamaatissinnaanngilai.

Imm. 2. Aalajangersakkat, isumaqatigiissummut uppersaartit, isumaqatigiisutit, maleruagassat maleruagassallu il.il. inatsimmik unioqutitsisut, atuuttussaannngillat.

§ 4. Kinaluunniit inummut allanut suaassuseq, naartuneq, meeravissartaarneq erninermi sulinngiffeqarneq, kinguaassitutigut sammivik, suaassutsini kinaassuseqarneq, suaassutsimik takutitsineq, suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, innarluuteqarneq, ukiut, politikikkikut isiginnittaaseq, upperisaq imaluunniit upperisaqarneq pissutigalugit assigiinngisitsinnginnissarlu pillugit. Inerteqqummi toqqaannartumik imaluunniit toqqaannangitsumik assigiinngisitsinerit pineqarput.

Imm. 2. Inuk tunngavissarititaasut imm. 1-imi taaneqartut pissutigalugit inuup allap assigisaanik inissimasup pineqarsimaneranut, pineqarneranut imaluunniit pineqartussaagaluerneranut sanilliullugu ajornerusumik pineqarpat, toqqaannartumik assigiinngisitsisoqarsimassaaq.

Imm. 3. Aalajangersakkap, piumasarisap imaluunniit suleriaatsip, arlaannaannulluunniit atarpasinnngitsup, inuit ilai, inunntut allanut sanilliullugu suaassuseq pissutigalugu immikkut inissitsissappagit, imaluunniit suaassuseq, naartuneq, erninermi sulinngiffeqarneq, kinguaassitutigut sammivik, suaassutsini kinaassuseqarneq, suaassutsimik takutitsineq,

suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, innarluuteqarneq, ukiut, politikikkut isiginnittaaseq, upperisaq imaluunniit upperisaqarneq pissutigalugit arlaatigut inississappatigit, toqqaannangitsumik assigiinngisitsisoqarsimassaaq. Taamaattoq aalajangersagaq, tunngavigisaq imaluunniit suleriaaseq pineqartoq inatsisinut naapertuuttumik kinaassusersiunngitsumik tunngavilersuutitaqarpat aammalu siunertap taassuma naammassinissanut aningaasassat naapertuuppata pisariaqarpatalu, taana atuutissanngilaq.

§ 5. Nakkarsaanerit suulluunniit kiisalu nuanninngitsumik pineq, inuup taamatut pissusilersornermik akuersiumannginnera imaluunniit akuersaarnera aallaavigalugu, Inatsisartut inatsisaannut matumunnga naapertuuttumik assigiinngisitsinertut isigineqassaaq.

Imm. 2. Inuup naleqassusaata innarlernissaa aammalu qunusaarisumik, akeqqersimaartumik nakkarsaasumik, nikanarsaasumik imaluunniit nuanninngitsumik akaareqatigiinnginnissaaq siunertaralugu imaluunniit taamatut sunniutilimmik, assigiinngisitsinermut tunngaviusunut § 4-mi taaneqartunut atatillugu kissaatigineqanngitsumik pissusilersortoqarpat, nakkarsaaneq pisimassaaq.

Imm. 3. Kinguaassiutitigut innimiilliorneq tassaavoq, pissusilersorneq kinguaassiutinut tunngasoq piumaneqanngitsoq. Pissusilersorneq tassaasinnaavoq oqaatsit atorlugit oqaasertaqanngitsumik, digitalimik timikkulluunniit pissusilersorneq, i . Pissusilersornermi siunertaavoq inuup naleqassusaanik innarliiniarneq. Pissusilersorneq qunusaarisumik, akeqqersimaartumik, nakkarsaasumik, nikanarsaasumik imaluunniit nuanninngitsumik kinguneqarsinnaavoq.

§ 6. Assigiinngisitsinermut tunngaviit § 4-ami taaneqartut pissutigalugit inuk assigiinngisitsivigineqarnissaanik imaluunniit nakkarsarneqarnissaanik ilitsersuineq, assigiinngisitsinertut imaluunniit nakkarsaanertut Inatsisartut inatsisaanni matumani isigineqarpoq.

§ 7. §§ 4-6 aamma § 15 unioqqutillugit assigiinngisitseqataanissaaq inerteqqutaavoq.

Assigiinngisitsinissamik inerteqquteqarnermi ilaatinneqanngitsut

§ 8. §§ 4-7 aamma § 15 apeqqutaatinnagit, inatsisinut naapertuuttumik siunertami kinaassusersiunngitsumik tunngavilersugaappat, tamatumalu naammassinissanut aningaasassat naapertuuppata pisariaqarpatalu, Inatsisartut inatsisaat una assigiinngisitsinissamut ajoqutaanngilaq.

Imm. 2. Imm 1 suaassuseq imaluunniit immikkut inuiaassuseq tunngavigalugit toqqaannartumik assigiinngisitsinermut tunngatillugu atuutinngilaq.

Imm. 3. Inatsisartut inatsisaat una §§ 4-7 aamma § 15 apeqqutaatinnagit atorfeqarnermi oqaatsit pillugit ilaatigut piumasaqaatinik aalajangersaanissamut akornutaanngilaq.

§ 9. §§ 4-7 aamma § 5 apeqqutaatinnagit, iliuusissat immikkuullarissut suaassutsimut, naartunermut, meeravissartaarnermut, erninermi sulinngiffeqarnermut, kinguaassiutitigut sammivimmut, suaassutsini kinaassuseqarnermut, suaassutsimik takutitsinermut, suaassutsit

ilisarnaataannut, kingoqqiffik, ammip qalipaataanut, inuiaqatigiinnut, inooqatigiinnermut imaluunniit inuianni pinngorfimmut, ukiunut, politikikkut isiginnittaatsimut, upperisamut imaluunniit upperisaqarnermut atasumik ajoqutissartaasut pitsaaliornissaannik imaluunniit naligiissinnissaannik siunertaqartut atuutsinnissaannut imaluunniit akuerinissaannut Inatsisartut inatsisaat una akornutaanngilaq.

Imm. 2. Iliuusissat immikkuullarissut imm. 1 naapertorlugu aallartinneqartut, iliuusissat siunertaasa naammassineqarsinnaalernerat tikillugu taamaallaat atuutsinneqarsinnaapput.

§ 10. Inatsisartut inatsisaat una §§ 4-7 aamma § 15 apeqqutaatinnagit, siunertaq akuerisaasumik siunertaqarnermik tunngaveqarpat aqqullu siunertap taassuma angunissaanut naleqquppat pisariaqarpallu taamaallaat salliutilluguluunniit suaassutsimi aalajangersimasumi inunntunngatinneqarpat sullissinissamut il.il. akornutaanngilaq.

§ 11. Inatsisartut inatsisaat una §§ 4-7 aamma § 15 apeqqutaatinnagit, upperisassiornermi inissisimanerup upperisalluunniit sammiviata siuarsarnissaanik suliffeqarfik siunertaqarpat sulisullu upperisaa upperisaataluunniit sammivia suliffeqarfimmut pingaaruteqartut isigineqarpat atorfiit ilaanni naleqqussinnaappat sulisup aalajangersimasumik upperisaqarnissaanik piunasaqarnissamut akornutaanngilaq.

§ 12. §§ 4-7 aamma § 15 apeqqutaatinnagit, taanna inatsimmik malitassanilluunniit allanit, tassunga ilanngullugit ataatsimut isumaqatigiissutit aamma sulisut kattuffiisa isumaqatigiissutaannik tunngaveqarpat, ukiut pissutigalugit assigiinngisitsisoqarsinnaavoq.

Kapitali 3

Iliuuseqarluni naligiissitaanermik assigiinngisitsinninnissamillu suliaqarneq

§ 13. Pisortani oqartussat sulisoqarfiillu inatsisinik allaffissornikkullu aalajangersakkanik, politikkinik aammalu suliaqarfinni Inatsisartut inatsisaanni uani pineqartuni ingerlatassanik ilusilersuinerminni piviusunngortitsinerminnilu suaassutsit akornanni naligiissitsinnissamik siunertaqarnerup aammalu assigiinngisitsisoqannginnissaata iliuuseqarlutik mianersuunnissaannik pisussaaffeqarput.

§ 14. Pisortani namminersortunilu sulisitsisut naligiissitsilernissaq § 4-ami immikkoortut tunngavigalugit assigiinngisitsinissap pinngitsoortinnissaa, sulisitsisut aaqquissuusaaffianni kattuffiini suliffeqarfianniluunniit iliuuseqarlutik, siunnerfilimmik pilersaarutaasumillu sulissutigissavaat, aammalu nakkarsaaneq aamma kinguaassiuutitigut innimiilliorneq pinngitsoortinniassallugit. Suliaqarnermi ilaatigut sulisussarsiorneq, aningaasarsianut sulinernullu atugassarititaasut, atorfimmi qaffasinnerusumik inissitsinneqarneq, ineriartornissamut periarfissat aammalu sulinerup ilaqutariittullu inuunerup ataqatigiissinnissaannut periarfissaqarneq, pineqartunut ilaatinneqarput.

Kapitali 4

Suliffeqarnermi pissutsini maleruagassat immikkut ittut

§ 15. Kapitali 2-mi assigiinngisitsinissap inerteqqutigineqarnera suliffeqarnermut tunngasortaannut tamanut atuuppoq. Taasani ilaatigut pineqartunut ilaapput:

- 1) Allagarsiissuteqarneq
- 2) Atorfinitsitsineq, allamut inissiineq atorfimmilu qaffasinnerusumik inissitsinneqarneq
- 3) Aningaasarsianut sulinernullu atugassarititaasut
- 4) Soraarsitsineq.

Imm. 2. Sulisitsisup sulinermik inuussutissarsiuteqartoq soraartissinnaangilaa, taanna matumani inatsit malillugu piunasaqaammik saqqummiussaqaarsimappat, taamatullu sulinermik inuussutissarsiuteqartoq Naligiissitaaneq pillugu aalajangiisartunut naammagittaalliuteqaarsimappat.

§ 16. Sulisitsisoq sulinermik inuussutissarsiuteqartumik atorfinitsitsinerup atatillugu imaluunniit atorfinitsitsinerup nalaani naartuneq, meerartaarnissamik pilersaaruteqarneq, erninermi sulinnigiffeqarneq, kinguaassitutigut sammivik, suaassutsini kinaassuseqarneq, suaassutsimik takutitsineq, suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, ukiut, politikikkut isiginnittaaseq, upperisaq imaluunniit upperisaqarneq pillugit paasissutissanik piunasaqaqusaanngilaq, piniqqusaanngilaq imaluunniit tiguseqqusaanngilaq atueqqusaananilu.

Imm. 2. Sulisitsisoq sulinermik inuussutissarsiuteqartoq atorfeqartitsinermini naartuneq, meerartaarnissamik, meerarsiartaarnissamik, erninermi suliffeqarnissamik pilersaaruteqarneq, atoqatigeeriaaseq, suaassutsimi kinaassuseq, suaassutsimik takutitsineq, suaassutsinut ilisarnaatit, raci, ammip qalipaataa, inuiaat, inuttut atukkatigut imaluunniit immikkut inuiaassuseqartunit pinngorfiit, innarluut, politikikkut isiginneriaaseq, upperisaq upperisaqarnerluunniit pillugit paasissutissanik qinnuiginnissanngilaq atuisinnaananiluunniit.

Imm. 3. Paasissutissat sulinerup imaluunniit inuussutissarsiornerup ingerlannissaanut aalajangiisuulluinnartumik pingaaruteqarpata, imm. 1-imi oqaatsit piginnaasat, upperisaq innarluuteqarnerlu pillugit paasissutissanik piniarnissamut killiliinngilaq.

§ 17. Sulisitsisup naartuneq, erninermi sulinnigiffeqarneq imaluunniit meeravissartaarneq pissutigalugit, naartunermut, erninermi sulinnigiffeqarnermut meeravissartaarnernullu atatillugu sulinnigiffeqarneq pillugu Inatsisartut inatsisaat qaqugukkulluunniit atuuttoq naapertorlugu sulinermik inuussutissarsiuteqartup sulinnigiffeqarnissamik piunasaqarnera pissutigalugu sulinermik inuussutissarsiuteqartoq soraartissinnaangilaa.

Imm. 2. Piffissaq sulinermik inuussutissarsiuteqartup sulinnigiffeqarneq pissutigalugu sulinniginnera atorneqaarsimanerup sivisussusiata naatsorsornerani ilanngunneqassaaq, tak. naartunermut, inernermi suliffeqarnermut meeravissartaarnernullu atatillugu sulinnigiffeqarneq pillugu Inatsisartut inatsisaat. Aalajangersakkami soraarninngornermi pissutsit pineqanngillat.

Imm. 3. Angajoqqaat naartunermi, erninermi meeravissartaarnermilu sulinnigiffeqarneq

pillugit Inatsisartut Inatsisaat naapertorlugu pisinnaatitaaffimminnik atuisimasut suliffitoqqaminnut imaluunniit assigisaanut, naartunermi, erninermi meeravissartaarnermilu sulinngiffeqarneq pillugit Inatsisartut Inatsisaat naapertorlugu, uternissamut pisinnaatitaapput. Angajoqqaat suliffimmi atukkanik pitsanngorsaanerit tamaasa sulinngiffeqarnerup kingorna pisinnaatitaasatik pisinnaatitaaffigai.

§ 18. Sulisartut, aningaasarsianut atugassarititaasut aalajangersarneqarnerat pillugu assigiinngisitsisoqartoq pasitsaassaqtartut, sulisitsisoq atorfinni sanilliunneqarsinnaasuni nalinginnaasumik aningaasarsiat annertussuserisartagaat aammalu aningaasarsianut atugassarititaasunik aalajangersaanissamut tunngavissarititaasut pillugit allaganngorlugu paasissutissiissasoq, piunasaqarsinnaapput.

Imm. 2. Aalajangersagaq una malillugu aningaasarsiat pillugit paasissutissanik tigusaqartoq nipangiussisussaataavoq aammalu nipangiussinissamut uppernarsaat atsiussallugu.

§ 19. Naartunermi, erninermi imaluunniit meeravissartaarnermi inuit illersorneqarnissaat pillugu aalajangersakkanik iluaqusiinerusussanik atuutsitsilernissamut imaluunniit atuutsitsiinnarnissamut Inatsisartut inatsisaanni aalajangersakkat akornutaanngillat.

Kapitali 5

*Inuussutissarsiornikkut imaluunniit tamanut iluaqutaasussatut suliffeqarfiup iluani
maleruagassat immikkut ittut*

§ 20. Inuussutissarsiornikkut imaluunniit tamanut iluaqutaasussatut suliffeqarfiup iluani, inuup kingoqqiffik, ammip qalipaataa, inuiaqatigiinni imaluunniit inuiaassutsikkut suminngaanneerfia, upperisaa imaluunniit kinguaassiutitigut sammivia, suaassutsini kinaassuseqarnera, suaassutsimik takutitsinera imaluunniit suaassutsini ilisarnaatai pissutigalugit allatuulli atugassarititaasut assingi tunngavigalugit inuit sullikkumanneqannginnerat, inerteqqutaavoq.

Imm. 2. Taamatuttaaq sumiiffimmut, takutitsivimmud, saqqummersitsivimmud, katerisimaartunut assigisaannulluunniit, tunngavissat imm. 1-imi taaneqartut pissutigalugit tamanut ammasumut, atugassarititaasut assingi tunngavigalugit inuup isertikkumannginnissaa, inerteqqutaavoq.

Imm. 3. Aalajangersakkami mianersuaalliornermi pissutsit ilaanngillat.

Kapitali 6

Naligiissitaaneq pillugu aalajangiisartut

Aalajangiisinnaatitaaneq aamma aaqqissuussaaneq

§ 21. Nalaakkersuisut Naligiissitaaneq pillugu Aalajangiisartunik politikkikkut sumulluunniit attuumassuteqanngitsunik pilersitsissapput. Naligiissitaaneq pillugu aalajangiisartut tunngavissarititaasut una inatsimmi illersorneqartut pissutigalugit assigiinngisitsinermut naammagittaalliutit suliarisarpai.

Imm. 2. Naammagittaalliut suliami inatsisitigut ataasiakkaatigut maannakkut nammineq soqutigisaqartumit Naligiissitaaneq pillugu aalajangiisartunut suliaakkiissutaasinnaavoq.

§ 22. Aalajangiisartut 1-imik siulittaasoqarput aammalu 4-nik allanik ilaasortaqlutik.

Imm. 2. Naalakkersuisut siulittaasoq, inatsisilerinikkut ilinniagartuutut angusilluni soraarummeersimasoq, Nunatta eqqartuussisuanit inassuteqarneq malillugu, toqqassavaat.

Imm. 3. Naalakkersuisut kattuffinnit, peqatigiiffinnit, sullissivinnit il.il. inassuteqaatit malillugit Naligiissitaaneq pillugu aalajangiisartunut ilaasortat toqqassavai. Inassutigineqartut suliaasaqarfanni una Inatsisartut inatsisaanni sammineqartuni ataatsimi arlalinniluunniit suliatigut uppersarneqartunik ilisimasaqassapput, aalajangiisartut taamaalillutik taamaattoqarsinnaatillugu tunngavinnik § 4-mi taaneqartunik tamanik ataatsimut ilisimasaqassapput.

Imm. 4. Naalakkersuisut Naligiissitaaneq pillugu aalajangiisartut katitigaaneranni, suaassutsit aappaanniittut annerpaamik ilaasortamik ataatsimik amerlanerutillugit, toqqaassapput.

Imm. 5. Siulittaasoq aammalu ilaasortat 4-t piffissamut ukiunik 3-nik sivilissusilimmut toqqarneqassapput. Ilaasortaq toqqarneqartoq ilaasortaajunnaarpat, ilaasortaajunnaarsinneqarpat imaluunniit suliaasani isumagisinnaajunnaarpagit, nutaamik toqqaasoqassaaq. Qinigaaqqittoqarsinnaavoq.

§ 23. Naalakkersuisut tunngavissarititaasut ataani allassimasut ilaat ataaseq arlallilluunniit naammassineqarsimappata, Naligiissitaaneq pillugu aalajangiisartuni ilaasortaq tunuartissinnaavaat:

- 1) ilaasortaq Inatsisartut inatsisaat una naapertorlugu ilaasortap suliaasaanik suliarinninnermini annertuumik sumiginnaappat.
- 2) Inatsisartut inatsisaat una naapertorlugu ilaasortap suliaasaanik toqqissisimanartumik ilaasortap suliarinninnissaanut annertuumik tatiginangitsumik, ilaasortaq iliuuseqarpat.
- 3) ilaasortaq tunuartinneqassasoq Naligiissitaaneq pillugu aalajangiisartuni ilaasortat 3-t inassutigippasuk, aammalu Naalakkersuisut pissutsinik misissuereermermi ilaasortaq tunuartinneqassasoq isumaqarpata.

Imm. 2. Naalakkersuisut aamma ataani pissutsit allaqqasut tunngavigalugit Naligiissitaaneq pillugu aalajangiisartuni ilaasortat tunuartissinnaavai

- 1) Ukiumut nalunaarusiunngippata.
- 2) Aalajangiisartut § 18, imm. 1 aamma imm. 2-mi suliaasat ininngippagit, naammaginartumillu pitsaassusilinngippagit.

Imm. 2 Naalakkersuisut aalajangiisartut imatut pippata Naligiissitaaneq pillugu aalajangiisartunik tunuartsisinnaapput

- 1) arlaleriarlutik ukiumoortumik nalunaarusiunngippata,
- 2) Aalajangiisartut suliaasanik § 21-mi taaneqartunik suliaqanngippata.

§ 24. Aalajangiisartut, kapitali 9 naapertorlugu, Matumani Inatsisartut inatsisaata inatsisip unioqquatinneqarneranut taarsiilluni akiliinissamik aalajangiisinnaapput.

§ 25. Aalajangiisartut naammagittaalliutit pisortat ingerlatsineranni oqartussamut allamut suliakkiissutaasinnaasut, taassuma suliame aalajangiinissaa sioqqullugu, sularisinnaangilaat.

Imm. 2. Aalajangiisartut suliassat eqqartuussivinni sularineqarlutik ingerlanneqartut, sularisinnaangilaat.

Imm. 3. Suliassaq aalajangiisartuni sularineqarluni ingerlanneqartillugu, suliame peqataasut suliassaq eqqartuussivinnut suliakkiissutigisinnaangilaat.

§ 26. Naligiissitaaneq pillugu aalajangiisartut suliassaminnut naapertuuttumik suleriaasissartik namminneerlutik aalajangersassavaat.

§ 27. Naligiissitaaneq pillugu aalajangiisartunut ilaasortat, Inatsisartunut Naalackersuisunut il.il. ilaasortat akissarsiaat pillugit Inatsisartut Inatsisaanni kapitel 7-imi malittarisassat naapertorlugit, akissarsiaqassapput. Aningaasartuutit taakku Aalajangiisartunut Nunatta Karsianit ukiumoortumik tapiissutit iluanni akilerneqassapput.

Naammagittaalliutinik sularinninneq

§ 28. Naalackersuisut Naligiissitaaneq pillugu Aalajangiisartunut kikkut allattoqarfimmi sullississanersut aalajangersassavaat, tamatumunnga ilanngullugu aalajangiisartut pisortat aqutsisoqarfiannit sullinneqassanersut.

Imm. 2. Allattoqarfiup aalajangiisartut naammagittaalliutinik sularinninnissaat piareersassavaat. Naammagittaalliutit allaganngorlugu tunngavissalimmik sularineqassapput.

§ 29. Aalajangiisartut naammagittaalliutip sularineqarneranut atatillugu suliame paasisimasalimmit oqaaseqaatinik piniarsinnaapput.

Imm. 2. Ataatsimoorluni isumaqatigiissutini aalajangersakkat unioqqutinneqarnerat pillugu suliassat sularineqarneranni, aalajangiisoqarsinnaalinnginnerani isumaqatigiissummi pineqartumi peqataasunit oqaaseqaammik aalajangiisartut piniassapput.

§ 30. Aalajangiisartut suliame naammagittaalliortoq taparserneqarsinnaangippat, naammagittaalliutip sularineqarnissaa itigartissinnaavaat.

Imm. 2. Naammagittaalliutit aalajangiisartuni suliassatut naleqqutinngitsutut nalilerneqartut allattoqarfiup itigartissinnaavai. Naammagittaalliorsinnaatitaasup aalajangiinerup aalajangiisartunut saqqummiunneqarnissaanik allattoqarfik qinnuigisinnaavaa. § 28, imm. 2-4-mi, § 29-mi aamma § 32-mi aalajangersakkat taamatuttaaq atuupput.

§ 31. Aalajangiisartut aalajangiisinnaatitaaneq siulittaasumut suliakkiissutigisinnaavaat.

Imm. 2. Tamatumunnga maleruagassat erseqqinnerusut aalajangiisartut suleriaasianni aalajangersarneqassapput.

§ 32. Aalajangiisartut aalajangiineri allaffissornikkut oqartussamut allamut suliakkiissutigineqarsinnaangillat.

Imm. 2. Aalajangiisartut suliami aalajangiippata aalajangiinerup eqqartuussivinnut suliassanngortinneqarnissaanut periarfissaq pillugu allattoqarfiup illuatungeriit ilisimatisstavai.

Imm. 3. Aalajangiinerit tunngaviusunut tunngassutillit, kinaassutsinik takuneqarsinnaatitsinnginneq naammattumik pisinnaappat aammalu suliami peqataasut illersorneqarsinnaappata, kinaassutsit takuneqarsinnaatinnagit tamanut saqqummiunneqassapput. Suliassarli tamanit ilisimaneqareerpat, aalajangiinerit tamanut saqqummiunneqarsinnaapput.

§ 33. Ukiut tamaasa kingusinnerpaamik 1. maj aalajangiisartut ukiup siuliani suliqaqarsimanertik pillugu nalunaarummik tunniussissapput. Nalunaarut aamma digitalinngorlugu kalaallisut danskisullu tamanut saqqummiunneqassaaq.

Kapitali 7

Suiaassutsit akornanni naligiissitaaneq immikkut pillugu

Pisortat ataatsimiititaliaanni, siunnersuisoqatigiinni, isumalioqatigiissitaanni assigisaannilu suaiaassutsit katitigaanerat

§ 34. Pisortat ataatsimiititaliai, siunnersuisoqatigiivi, isumalioqatigiissitaliai assigisaallu Naalackersuisunit pilersinneqartut, katitigaanerminni suaiaassutsini aappaaniittut annerpaamik ataatsimik amerlanerussapput.

§ 35. Naalackersuisut siulersuisunut, sinniisoqarfinnut assigisaannullu ataatsimoorluni aqutsisunut ilaasortanik toqqaasoqartillugu, suaiaassutsini aappaaniittuni ilaasortaq ataaseq annerpaamik ataatsimik amerlanerutillugu toqqaasoqassaaq.

Imm. 2. Naalackersuisut siulersuisunut, sinniisoqarfinnut imaluunniit assigisaanik ataatsimoorluni aqutsisunut ilaasortat ilaannaannik toqqaallutik pisoqartillugu, Naalackersuisut imm. 1-imi aalajangersagaq apeqqutaatinnagu, ataatsimoorluni aqutsisuni tamarmiusuni suaiaassutsit akornanni naligiimmik amerlassusiliisimaneq ersersillugu, ilaasortanik toqqaassapput.

§ 36. Oqartussat imaluunniit kattuffiit inatsimmi §§ 34 aamma 35 naapertorlugit siulersuisunut, ataatsimiititalianut il.il. ilaasortassanik, tamakkiisumik ilaannaasumilluunniit Naalackersuisunit toqqarneqartussanik, inassuteqartussat, suaiaassutsini tamani ataaseq siunnersuutigissavaat. Ilaasortassanik amerlanerusunik siunnersuuteqartoqarpat, siunnersuutigineqartut suaiaassutsini tamani amerlaqatigiissapput.

Imm. 2. Oqartussat, kattuffiit il.il. immikkut pissutissaqarpata imm. 1-imi aalajangersagaq avaqqussinnaavaat, taamaattoqarpallu Naalackersuisunut tunngavilersorluakkamik allassapput.

Imm. 3. Ilaasortassanik inassuteqarneq aalajangersakkamut naapertuuttumik pisimangippat, inassuteqaat pineqartoq Naalackersuisut tunngavigisariaqanngilaat. Taamatut pisoqartillugu oqartussaq imaluunniit kattuffik pineqartoq nutaamik inassuteqassaaq. Imm. 2 naapertorlugu tunngavilersuut akuerineqarsinnaanngippat, assigisaa atuutissaaq. Kattuffik

Naalakkersuisunut inassuteqaateqanngippat, ilaasortaq aammattaaq sinniisussaqartillugu Naalakkersuisunit toqqarneqassaaq.

Aningaasarsianut naatsorsueqqissaarneq suaassutsinut agguagaasoq

§ 37. Naatsorsueqqissaartarfik minnerpaamik ukioq allortarlugu suaassutsinut agguagaasumik aningaasarsianut naatsorsueqqissaartarpoq.

Kalaallit Nunaanni Naligiissitaanermut siunnersuisoqatigiit

Kapitali 8

Naligiissitaanermut siunnersuisoqatigiit suliaasaat

§ 38. Naligiissitaanermut siunnersuisoqatigiit suaassutsit akornanni naligiissitaanerup siuarsarnissaa, naligiissitaanikkut pisinnaatitaaffiit soqutigisallu suliaasarai, kiisalu inuiaqatigiinni suaassutsit akornanni naligiissitaaneq ukkatarissallugu, taannalu pillugu paasissutissiisassallutik. Naligiissitaanermut siunnersuisoqatigiit pissutsinik naligiissitaanerumut tunngasunik, piумаaffigineqarnermikkut imaluunniit nammineq suliniuteqarnermikkut, misissuisinnaapput. Naligiissitaanermut siunnersuisoqatigiit peqataasut allanut misissuinerminni il.il. akileeqqusisinnaapput. Naligiissitaanermut Siunnersuisoqatigiit ingerlatsisut allat sinnerlugit misissuinerminni il.il. akiliisitsisinnaapput.

Imm. 2. Naligiissitaanermut siunnersuisoqatigiit:

- 1) Inatsisartut inatsisaata atorneqarnera, tamatumalu inuiaqatigiinni qanoq atuutsinneqarnera malinnaaffigissavaat.
- 2) Naalakkersuisunit ujartuisoqarnerani oqaaseqaateqassapput. Oqaaseqaatit tamanit takuneqarsinnaassapput.
- 3) sammisassanik paasissutissiinertut oqallitsitsilertussatullu ittunik aallartitsissaaq.
- 4) pisortat ingerlatsinerannut taakkulu sullissiviinut, suliffeqarfinnut namminersortunut inuiaqatigiinnilu ataasiakkaanut siunnersuisutut sulissapput.

Imm. 3. Naligiissitaanermut siunnersuisoqatigiit aammattaaq:

- 1) Inuiaqatigiinni naligiissitaaneq pillugu ilisimasanik katersissapput, ineriartortitsissapput aammalu paasissutissiisassapput.
- 2) naligiissitaaneq pillugu paasissutissat tamanut, ilaatigullu ilinniartunut, ilisimatuunut, suliaqartunut politikerinullu malinnaaffigineqartussanngorlugit nutartertassavai

Imm. 4. Naligiissitaanermut siunnersuisoqatigiit aammattaaq:

- 1) pisortat sullissiviinit suliffeqarfinnullu naligiissitaanerumut aallartitanut ikiuutissapput.
- 2) naligiissitaanerumut iliuusissat pillugit isumassarsianik, siunnersuutininik suliniutissanillu inuiaqatigiinni naligiissitaanermik pitsanngorsaasussanik, oqartussanut il.il. suliaqassapput.
- 3) Ileeqqusumik suaassutsini inissisimanermi nuanninngitsortasut allanngortinnissaat siunertarlugu paasissutissiinermik suliaqarneq ingerlatissavaat.
- 4) Pisortani sullissiviit kattuffiillu allat, suaassutsimut attuumassutilimmik persuttaasernerup akiorniarnissaanik siunertaqartumik, suleqatigissavai.

5) Suliffeqarnermi naligiimmik aningaasarsiaqarnissaq aammalu suaassutsikkut assigiinngisitsinermi ajornartorsiuteqarfiusut sulissutigissavai.

Imm. 5. Naligiissitaanermut siunnersuisoqatigiit ukiut tamaasa kingusinnerpaamik 1. aprilimi Naligiissitaanermut siunnersuisoqatigiit suliaqarnerannut allaganngorlugu nalunaarummik Naalakkersuisunut Inatsisartunullu saqqummiissaaq. Nalunaarut tamanut saqqummiunneqassaaq.

§ 39. Naligiissitaanermut siunnersuisoqatigiit suliassai inatsimmi aalajangersagaasut aallaavigalugit Naligiissitaanermut siunnersuisoqatigiit ukiumoortumik ukkatarinniffii suliniuteqarfiilu Naligiissitaanermut siunnersuisoqatigiinnut allattoqarfiup aalajangersassavai.

Imm. 2. Naligiissitaanermut siunnersuisoqatigiit naligiissitaanermut suliassaqarfimmi periusissianik ineriartortitsinerannut allattoqarfik ikiutissaaq.

§ 40. Inatsisartut, Naalakkersuisut pisortanilu oqartussat allat, apeqqutini nalinginnaasuni tamani, naligiissitaanermut pingaaruteqartuni, Naligiissitaanermut siunnersuisoqatigiit isumasiorfigisinnaavai.

§ 41. Naligiissitaanermut siunnersuisoqatigiit suliassaqarfiannut tunngasut pillugit killilersorneqaratik oqaaseqarnissamut Naligiissitaanermut siunnersuisoqatigiit pisinnaatitaapput. Oqaaseqaateqarnerit kimut saaffiginnissanersut, Naligiissitaanermut siunnersuisoqatigiit nammineerlutik aalajangissavaat.

Naligiissitaanermut siunnersuisoqatigiit aaqqiissuusaanerat

§ 42. Naalakkersuisut naligiissitaanermut siunnersuisoqatigiit politikkimut attuumassuteqanngitsut pilersissavai. Naligiissitaanermut siunnersuisoqatigiit katillugit arfineq marlunnik ilaasortaqarput.

Imm. 2. Siulittaasoq ilaasortallu allat piffissamut ukiunik sisamanik sivisussusilimmut toqqarneqassapput. Ilaasorta q toqqarneqartoq ilaasortaajunnaarpat, ilaasortaajunnaarsinneqarpat imaluunniit suliani isumagisinnaajunnaarpat, nutaamik toqqaasoqassaaq.

§ 43. Naalakkersuisut qinigassatut inassutigineqartut akornanni siulittaasumik toqqaassapput.

Imm. 2. Naalakkersuisut kattuffiit, sulinerimik inuussutissarsiuteqartunik imaluunniit sulisitsisunik sullissisut, inassuteqarnerisigut Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 3. Naalakkersuisut kattuffiit, sullissiviit il.il. meeqqanik inuusuttunillu sullissisut imaluunniit meeqqat inuusuttullu pillugit suliaqartut, inassuteqarnerisigut Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 4. Naalakkersuisut kattuffiit, peqatigiiffiit, sullissiviit il.il. ilinniartitaanermik, meeqqat atuarfiannik ilisimatusarnermilluunniit suliaqartut, inassuteqarnerisigut

Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 5. Naalakkersuisut kattuffiit, peqatigiiffiit, sullissiviit il.il., suaassutsit inissisimaffiinik imaluunniit suaassutsit ataasiakkaat soqutigisaannik pisinnaatitaaffiinillu suliaqartut inassuteqarnerisigut ilaasortamik ataatsimik marlunnilluunniit toqqaassapput.

Imm. 6. Naalakkersuisut ilaasortat sinnerinik inuiaqatigiinni naligiissitaanermik soqutigisaqartut sinniisaannik toqqaassapput.

Imm. 7. Naalakkersuisut kattuffiit, peqatigiiffiit sullissiviillu suut siunnersuisoqatigiinnut ilaasortanik inassuteqarsinnaanerit pillugu maleruagassanik erseqqinnerusunik aalajangersaasinnaapput.

§ 44. Naalakkersuisut Naligiissitaanermut siunnersuisoqatigiinni ilaasortaq piffissap ukiunik sisamanik sivisussusillip iluani ilaasortaaajunnaartissinnaavaat, tunngavissarititaasut uku naammassineqarpata:

- 1) Ilaasortaq Inatsisartut inatsisaat naapertorlugu ilaasortap suliassaannik sularinninnermini annertuumik sumiginnaappat.
- 2) Inatsisartut inatsisaat naapertorlugu ilaasortap suliassaannik toqqissisimanartumik ilaasortap sularinninnissaanut annertuumik tatiginangitsumik, ilaasortaq iliuuseqarpat.
- 3) Ilaasortap tunuartinneqarnissaa Naligiissitaanermut siunnersuisoqatigiinni ilaasortanik pingasunit allakkatigut tunngavilersugaasumillu inassutigineqarpat, aammalu Naalakkersuisut misissuereernerminni isumaqarpata ilaasortaq siunnersuisoqatigiinni ilaasortaanissamut naleqqukkunnaartoq.

Imm. 2. Naalakkersuisut aamma ataani allaqqasut tunngavigalugit Naligiissitaanermut siunnersuisoqatigiit ilaasortaanik tunuartitsisinnaapput:

- 1) Naalakkersuisunut ukiumut nalunaarusiunngippata aamma naatsorsuusiunngippata.
- 2) Siunnersuisoqatigiit § 35, imm. 2 aamma imm. 3-mi suliassat ininngippagit, naammaginatumillu pitsaassusilinngippagit.

§ 45. Naligiissitaanermut siunnersuisoqatigiit §§ 38-41 naapertorlugit suliassaminnut naapertuuttumik suleriaasissartik nammineerlutik aalajangersassavaat.

Naligiissitaanermut siunnersuisoqatigiit allattoqarfiat

§ 46. Naligiissitaanermut siunnersuisoqatigiit ulluinnarni suliassaminnik isumaginnittussamik allattoqarfimmik pilersitsissapput.

Imm. 2. Naligiissitaanermut siunnersuisoqatigiit Namminersorlutik Oqartussani sulisunut maleruagassat sukkulluunniit atuuttut malillugit allattoqarfimmi sulisunik atorfinitsisinissamut soraarsitsisinissamullu aalajangiisinnaatitaapput.

Aningaasalersuineq

§ 47. Naligiissitaanermut siunnersuisoqatigiinni ilaasortat Inatsisartuni Naalakkersuisunilu il. il. ilaasortat aningaasarsiaqartitaanerit il. il. pillugit Inatsisartut inatsisaanni kapitali 7-imi malittarisassat malillugit akissarsiaqartinneqassapput, ullormusiaqartinneqassapput

angalanermullu aningaasartuutitut ajunngitsorsiassaqaartinneqassallutik. Aningaasartuutit taakkua Siunnersuisoqatigiinnut Nunap karsianit ukiumoortumik tapiissutit iluanni akilerneqassapput.

Missingersuutit naatsorsuutillu

§ 48. Naligiissitaanermut siunnersuisoqatigiit ukiup tullianut missingersuutitut siunnersuummik ukiumoortumik Naalakkersuisunut saqqummiissapput. Siunnersuut isertitassatut aningaasartuutissatullu naatsorsuutigineqartunut missingersuinermik imaqaassaaq. Peqatigisaanik ukiunut tulliuttunut Nunap Karsiata tapiissutissaasa annertussusissaannut siunnersuut saqqummiunneqassaaq.

§ 49. Naligiissitaanermut siunnersuisoqatigiit ukiumoortumik naatsorsuutit, kukkunersiuisumit kukkunersiorneqartussanik, suliaqassapput.

Imm. 2. Ukiumoortumik naatsorsuutit kukkunersioriikkat ukiut tamaasa kingusinnerpaamik, ulloq 1. september Naligiissitaanermut Naalakkersuisoqarfimmut tunniunneqartassapput.

Kapitali 9

Taarsiiffigitinneq, uppersaasusaaneq pineqaatissiisarnerrillu

§ 50. Inatsisartut inatsisaata unioqputinneqarnerani inuit pisinnaatitaaffimmikkut innarlerneqartut taarsiiffigineqarsinnaapput.

Imm. 2. Inuk §§ 4-7 aamma § 15 malillugit piumasaqaammik saqqummiussisimanani pissutigalugu iluaqutaanngitsunik iliuuseqarfigineqarpat imaluunniit iluaqutaanngitsunik kinguneqartumik pineqarpat, taarsiiffigineqarnissaa akuerineqarsinnaavoq.

§ 51. Sulineramik inuussutissarsiuteqartoq §§ 15 imaluunniit 17 unioqputillugu soraarsinneqarpat, sulisitsisup taarsiivigineqarnera akilissavaa. Taarsiissutissaq sulineramik inuussutissarsiuteqartup piffissaq atorfeqarsimanera suliamilu allat pisut eqqarsaatigalugit aalajangersarneqassaaq.

§ 52. Sulineramik inuussutissarsiuteqartoq, aningaasarsiaanni imaluunniit aningaasarsiaanut atugassarititaasuni § 15 unioqputinneqarpat, aningaarsiaasa assigiinngissutaannut naapertuuttumik taarsiivigineqarsinnaavoq.

§ 53. Sulineramik inuussutissarsiuteqartoq § 15 naapertorlugu assigiinngisitsinnginnissaq pillugu piumasaqaammik saqqummiussisimanera pissutigalugu soraarsinneqartoq, taarsiivigineqarsinnaavoq. Taarsiissutissaq sulineramik inuussutissarsiuteqartup piffissaq atorfeqarsimanera suliamilu allat pisut eqqarsaatigalugit aalajangersarneqassaaq.

§ 54. Inuup innarligaalluni isumaqartup, §§ 4-7 aamma § 15 naapertorlugit pissusiviusuni pisut, toqqaannartumik imaluunniit toqqaannanngitsunik assigiinngisitsisoqartoq pasitsannerminut pissutaasut uppersarsarpagit, illuatungiusup Inatsisartut inatsisaanni matumani assigiinngisitsinnginnissaq pillugu malittarissat unioqputinneqanngitsut

uppernarsaassaaq.

Imm. 2. Inuk assigiinngisitsinnginnissaq pillugu piumasaqaammik saqqummiussereernerata kingorna, §§ 4-7 aamma § 15 naapertorlugit, kingusinnerpaamik qaammatit aqqaneq marluk iluanni soraarsitaappat, soraarsitsineq suliffeqarfimmi pissutsit naapertorlugit tunngavilersorluagaasoq, sulisitsisup uppernarsassavaa.

Imm. 3. Naartunini pillugu sulisitsisumut nalunaarutiginnereernermini inuk soraarsinneqarpat, sulisitsisup soraarsitsineq naartunermut attuumassuteqanngitsoq uppernarsassavaa.

§ 55. § 20-mik unioqquitsineq pinerluttulerinermi inatsit naapertorlugu pineqaatissiinermik kinguneqarsinnaavoq.

Imm. 2. Ingerlatseqatigiiffiit (inatsit naapertorlugu inuttut isigineqartut) pinerluttulerineq pillugu inatsimmi kapitali 5-imi malittarisassat malillugit pinerluttulerinermi akisussaatinneqarsinnaapput.

Kapitali 10

Atuutilersitsineq, ikaarsaariarneq atorunnaarsitsinerlu pillugit aalajangersakkat

§ 56. Inatsisartut inatsisaat 1. januar 2024-mi atulersinneqassaaq.

Imm. 2. Peqatigisaanik angutit arnallu naligiissitaanissaat pillugu Inatsisartut inatsisaat nr. 3, 29. november 2013-imeersoq atorunnaarsinneqarpoq.

Imm. 3. Peqatigisaanik Race il.il. pissutigalugit assigiinngissitsinissamik inerteqquteqarneq pillugu inatsisip Kalaallit Nunannut atuutilersinneqarnera pillugu peqqussut nr. 27, 4. februar 1972-imeersoq atorunnaarsinneqarpoq.

Imm. 4. Inatsisartut inatsisaat naapertorlugu Naligiissitaanermut Siunnersuisoqatigiit nutaat ulloq 1. juli 2024 atulersussat toqqarneqassapput.